

石頭 都有生命

梁肇元，36歲，印刷公司銷售人員，洗石天使活動召集人，平均每月一次帶團到望夫石和長洲小長城洗石。

洗石兩年，夏天烈日當空擦兩擦已經成身濕晒，冬天又凍到對手赤赤痛，但我哋都堅持用布底砂紙和鋼絲刷徒手擦走石上塗鴉而不用清潔劑，因為化學清潔劑會損害岩石和石底的動植物，所以我哋覺得肯來洗石的人都係保護大自然的天使。

我喺公屋長大，一直以來都循規蹈矩，從未破壞過一草一木，連一隻甲由飛過我都會徒手捉住放歸自然。中學讀地理，知道原來石頭好千變萬化，會隨時間而被風化，變出各種不同的形狀和顏色，最後被風雨完全侵蝕，話消失就消失，就好似人一樣，有生命有歷史，從此愛上。


我愛石但不痴戀，也不會隨便執塊石頭回家。有次去東坪洲見到有人將石頭放入手袋，我忍唔住即時出言勸阻，雖然最後換來別人一句「關你咩事？」再加一百句粗口問候，但我仍然覺得無錯。反而覺得佢哋唔尊重大自然，尤其是那些愛在石頭塗鴉的人。

中七畢業後我去了英國讀經濟，02年畢業回港，一心想入銀行業，

怎料遇上沙士，最後做咗 Sales。Sales 生涯好緊張，行山睇石遂變成我工餘興趣。後來想更深入認識香港生態和石頭，於是報讀生態旅遊課程，估唔到被講師吳振揚拉入香港地貌岩石保育協會做義工，仲認識到依家個老婆，假日齊齊上山洗石。

塗鴉多數用噴漆、乳膠漆和塗改液，最難搞的是噴漆、顏色實，滲入石縫後好難擦得甩。乳膠漆會慢慢龜裂，有時用手指都搥得走，最易搞。有人話咁擦法一樣傷害岩石表面，又話我哋咁做曷居無聊，但我哋只希望大家可以欣賞岩石原貌，尊重佢哋都有生命。講無聊，都唔及那些塗鴉人，寫來寫去唔係「到此一遊」就係「阿茂愛阿水」。不過，好彩佢哋只係識寫這些，否則我哋有排擦。7

洗石三寶：勞工手套、砂紙和鋼絲刷。



每次洗石約45分鐘，擦甩表面顏色，要連續擦4至5次才能擦得比較徹底。

